

Comun General: n auter vèrech

L Comprenjorie Ladin à endò avert la consultazions sun n nef sboz del statut: dal sit internet del C11 se pel l lejer e portèr dant la osservazions

Somea che pian pian sul troi envers l'aproazion del statut che darà l via al nef Comun General de Fascia se meve endò vèlch vèrech. Chest amàncol l'é chel che tropes se augura, vedù che ti ùltime egn de chest vers no l'é stat fat de gregn vèresc. A la fin de messèl del 2009 l'é stat enjignà n nef sboz del Statut, frut de vèlch imput ruà ite da istituzions e movimenc de val e dapò vardà fora amò da la comiscion tecnica enciarièda per chest lurier.

Enstadì sul sit del Comprenjorie (www.c11.tn.it) l'é stat publicà l sboz de statut del Comun general de Fascia, agiornà ai 29 de messèl

2009, acioche amistradores, conseieres de comprenjorie, conseieres de comun e jent de la val posse ge ruèr apede a l lejer.

“L Comun General de Fascia – disc l president del Comprenjorie Leonardo Bernard - l'é l davegnir de la comunanza fascèna. Sie statut ge recognosc l'autonomia a la comunanza che vif sun sie teritorie, l'endresa la formes e la modalitèdes de ejercizie de la funzion de goern, che troa fondament tel consens de sia jent e te la partezipazion di comuns e che arsegura sie svilup zivil, culturèl, economich e sozièl. L'à desche obietif ence chel de portèr

inant e vardèr via la cultura ladina de sie popul e de ciolèr leames con duta la comunanza ladina entria.

Con chesta publicazion se enten soscedèr l'enteress e la colaborazion de duc chenc, per orir n confront adatà e co la maor partezipazion possibola su n argument sci emportant e atual.

Chi che lec vegn ence envié a se emprevaler del formulèr che se troa semper su la medema piata del sit internet per ge manèr ite al Comprenjorie osservazions, prezisazions e comenc che podessa vegnir bogn te l'aproazion de chest statut.”